

海南叢書第十五種

松谿小草
揚齋集
合編

海南書局印行

69412

松 谿 小 草

目 錄

序

學庸淺言序

史評序言

歷代帝王聖賢將相圖序

樊侯稱觴序

胡母周孺人八秩開一序

陳亦先七十有一序

引

丘君雨長暨資配潘孺人六十雙壽引

金蓮菴寡化重修大士堂引

銘

湧玉泉銘

目 錄



記

續龍梅四景小引 萬松壘 龍梅壙

寄傲軒記

重修廟宇題名記

贊

小影自贊

陳亦先像贊

題周端臣岳翁遺像

祭文

祭張葳宇文

祭符儀山先生文

祭王漫叟文

詩

松 谿 小 草

古珠峴

別友人梁蘭邨

梁蘭邨爲予作松石歌以答之

松

寄題試劍峯大小洞天

戊寅清和月喜八閩老友燕及偕諸子過松溪遍探名勝爲揮六圖紀遊

作此誌盛

戊寅冬懷兒北征二首

雨中觀壁間書畫憶亡友

松間挂笠

贈東河友人吳遂章

石浪濯足

懸崖聽泉

題董宗伯書畫冊

冰霜節操歌爲吳明府李太君作

松 谿 小 草

目 錄

四

李濱江廣南遊歸舟泊瓊島握手言歡道及廣南之盛爲賦廣南八詠

四

題韓夫人撈月圖

柬何心斗

十月海棠花開瓊庠爲瓊山王明府贊作

贈雲載青

七星嶺

中秋阻雨步樊明府韻二首

上灘

下灘

移花就雨

嶺上村雨宿

答漫叟

石浪亭落成

友人吳子菴郵政新詩有池十畝構軒臨焉命以名齋偶記杜陵有殘夜
水明樓之句聊以水明額之不知軒中人午夜讀倦四壁無聲斗轉星

松 谿 小 草

稀水明之致果有當否當爲予道之

丙子八月廿三日颶風

候渡

丙子九月登文筆峯

聽友人談遺事

不寐

扁舟曉汎

寄題澹庵泉

文峰覽勝

題蓮華庵

過雲齊灘

太平道中

海安即事

奉和樊明府重陽登高四韵

寄懷葉蒼崖

步張卓盈見贈原韵

目錄

松 谿 小 草

目 錄

庚寅仲春訪家元有山中茅齋

登蒼屹山

約梁蘭邨同登建江樓二首

走筆柬蘭邨兼索題箋

初冬偕梁蘭邨郊外訪友馬上口占

李濱江廣南遊歸舟泊瓊島賦此贈之

訪林桂如邨莊

疊石先生漫叟翁暨諸同人集石浪亭聽松

和漫叟韻

登郡城鼓樓選四

丙子仲春偕家懷晉永日汎舟分韻共賦

九日問友吳旭升病

秋日防張嘉湖

丙子秋建江買舟入桃谿訪漫叟

別施澄菴歸攜李

贈漫叟

松 谿 小 草

贈家懷晉兄

丁丑花朝訪家印白第

晚登慈雲巖

月夜贈梁瑞楨

寄懷李苑超世姪

游惠液泉

山產曉發馬上口占

贈覃丹溪

建江清曉

癸未仲春望日過石門訪江祥文不遇

仲夏訪東河吳遂章友人山居

贈寧波周漢雯

依原韻答林文若

重九雨霽偕友人蔡天三由龍門塔過溪至松林

謝樊明府遙寄詩箋

秋淋阻約寄懷樊明府

松 谿 小 草

目 錄

陳揆章招飲秋雨阻行賦謝

癸未除夕

癸未杪冬喜陳惕若過訪松溪書舍賦贈

入臨高道中同葉蒼崖作

奉和樊明府後堂落成原韻

甲申雨中七夕

甲申九日偕諸友人登文筆峯得高字

菊月偕何心斗莫式翁攜樽過金蓮精舍劇談

步原韻贈周洛臣

冬月過嘉湖贈張惟簡

寄懷廬韓五

寄懷邱雨長

冬日與周洛臣登九曲尖峯

那山雅集卽席分賦

仲冬紀異

甲申杪冬喜晤疊石先生重遊建江

松 谿 小 草

遣懷呈吳于菴
答莫介梧原韻

清曉汎舟

戊子重九後二日誌感

九日偕同人登萬松壘得松字

家鶴洲自萬春解組過訪喜晤有用故友連宵共談

九日會陽道中己丑年

別李友生歸東甌

莫介梧公車北上遶道定襄家晉予署中詩以訊之

喜嘉禾陸世兄過訪龍梅村居

答潘禿翁下榻茉莉軒韻

送陳望雲歸餘姚

庚寅暮春訪家鶴洲

五指參天

過愈村訪王石君不遇

春日酌酒

松 谿 小 草

目 錄

春日途次
題樊明府瀟湘夜月圖
偶成

松 谿 小 草

松谿小草序

三百篇後有離騷。作詞林之玉律。十九首前爲樂府。垂古體之金針。由沈宋而韻諧。迨盛唐而體備。如李杜、如儲王、如韋孟。指不勝屈。而派總相傳。爲長慶、爲大曆、爲西崑。體亦稍殊。而義歸一致。律至唐而極矣。故後人以爲鼻祖。在宋豈無人乎。然道學窠臼也。明洗宋朝積習。饒豪華飄逸之姿。清追正始元音。有雋傑鮮妍之致。歷下竟陵二選。愈變而愈工。允合風人之旨。梅村阮亭諸公。彌質而彌永。無忝大雅之林。瓊島鍾靈。誕毓兩朝宮保。文峯啓瑞。篤生一代偉材。詩價久重鷄林。詞源聿傳鯉訓。故松谿子王沂元、夙嗜在詩。鳳毛繼美。率口成句。龍甲呈輝。或卽事。或書懷。義祖西河。而兼漢魏諸家之粹。或古風。或近體。法宗工部。而括勝昭代之華。今茲小草。特見一班。號曰松谿。著龍梅之實錄。名爲小草。反遠志而謙言。嘗宿高齋。連床劇論。夫詩本於性情。由於學問。學問博而性情深。筆端饒蘊藉。觀其品格。論其體裁。體裁醇而品格峻。腕下有神機。白沙

松 谿 小 草

曰、詩之工。詩之衰也。心聲原無粉飾。奚必求工。余竊謂詩之險。詩之蘊乎。性體本自和平。何須設險。至其作法。要有天機。辟之神龍。首則突兀凌霄。頸則驪珠緊抱。腹則鱗甲輝煌。尾則廻環旋掉。一律而具一身之運。辟之花卉。始則氤氲甲折。繼則破煖榮敷。中則驚霜轉變。終則落葉歸根。八句而兼八節之全。是非深入箇中。那識其中奧妙。若不神遇象外。烏知其外離寄。且夫詩文之境地極高。天地古今。供吾驅役。詞人之取材甚富。山川花鳥。入我品題。雖風雲月露。有連篇累牘之譏。而草木昆蟲。爲挖雅揚風風所借。隨機起興。故蕭露啓忠臣之詠。搗杵抒孝子之章。覩物增懷。故草蟲深靜女之思。楊柳起征人之慨。無景亦無詩。黃鶴樓前寧閣筆。有情方有句。涪陵橋畔可携囊。胸羅錦繡之才。化作三千風月。口吐珠璣之彥。翻成一曲陽春。此小草之見端。連床所共論者也。然而藝圃之荒久矣。騷壇之職難哉。索句案頭。衆喙何能適。用敲詩驢。背羣笑其不知時。作者既稀。觀者亦少。殊不知人無吟咏。後代誰繼古風。教廢詩篇。舉世皆爲俗物。試思石

松 谿 小 草

抑而泉吟。風敲而竹嘯。無情之物亦如斯。春妍而鳥唱。秋老而蛩悲。有覺之倫胡不爾。設若歌喉長寂寂。空令景物笑人。如其詩興總荒荒。莫怪乾坤困我。嗚呼。伊豈無情歟。吾因有感矣。古之爲詩也易。耕耘野老。荷鋤笠以長謠。江漢婦人。亦置鑿筐而遣興。今之爲詩也難。鼎食名卿。誰擅九能而作賦。寒窓學究。孰能七步以成吟。古之詩傳也多。文選樓中。遍輯名家傑構。而崑山白璧。不因阻隔遐遠。今之詩傳也寡。藥珠集內。祇收當路鴻名。而滄海明珠。竟以隱淪見棄。總爲時人不用。因而墨汁香沉。家塾無談。以致筆花瓣殞。偷復採於輶軒。孰謂不追蹤二雅。若還廣於鏤院。誰云不躡跡三唐。故因序小草。而感慚係之。

嘯墅吳震宇撰

新刻松谿小草序

嘗謂人生於憂患。而詩工於窮愁。動心忍性。增益不能。天之所以玉成人。大類如是。故杜工部遭天寶之變。遷徙流離。身經三峽之峯。足踏九折之

松

谿

小

草

坂。閱歷羊腸鳥道。靡有定居。而其後一吟一咏。勞心嘔血。憂國愛民。遂爲唐代冠冕。他如韓之家隔秦嶺。孟之廬結南山。各成一家。惟右丞身都通顯。詩畫並工。要不是過焉。雖古今人不相及。竊以爲我高祖松溪公。其生平若可髣髴者。公之先人奉直大夫。當滄桑改變之候。五指鬼域。四洲鯨鯢。結連爲亂。奉直、公義不受屈。身殲家破。公甫離襁褓。寄養瓊樂。千鈞一髮。飄然一葉。隨風泊岸。至於成立。當斯時也。井里麋遊。宗支鳥散。公招亡集流。披榛剪棘。門戶粗具。蒼芥蕪雜。豈復留心經濟。注意詞章。欲著爲一家之言者哉。然而公惟不求聞達。經術自治。聰明天授。才思軼羣。枕藉典籍。膾炙子史。香薰馬班。黜探屈宋。遂至性情放曠。偃蹇林壑。笑傲烟霞。探勝訪幽。招友結社。稱觴聯詠。嘯月吟風。筆大如椽。才敏若注。乃及珠璣滿帙。錦繡充囊。昔人稱公爲博學宏詞。此之謂也。集旣成。因自號爲小草。猶是紹聞衣德之。距今已數世矣。孫等俗不可療。古不成癖。下里巴人。未諳陽春。湫隘塵囂。曷覩爽塏。然往往爲縉紳先生。往來借覽。嘆賞不置。

松 谿 小 草

謂公之詩文、譬如春花璀璨。千紫萬紅。目不給賞。又如夏雲變化。奇形怪狀。刻不相同。又如秋江泉湧。驚風狂浪。起伏無常。又如冬嶺葉枯。蒼柏翠松。高標特秀。備四時之氣。通萬物之理。未必不自憂患窮愁中。銷肌磨骨。鍊氣鍛神而成之者。宜乎子孫之知所珍惜而寶藏之也。騰等敬佩其言。無如褚先生受欺蠹魚。即墨侯亦如時鳥。如公之艱難草創。上承禮部之緒。下貽數世之傳。其片字單辭。曷忍湮沒。爰重編天池之會。劇餘金而并付諸梓。俾後世讀公之詞。知公之事。憫公之苦。續公之志。是騰之厚望也。是爲序。嘉慶歲次己亥仲夏月立孫騰龍拔齋氏。

薰沐拜撰

本傳

王懋曾。字沂元。號松溪。明大宗伯宏誨曾孫。二品廕生思南府知府。汝鯤孫。廕生。官工部屯田司。昌言子。崇禎甲申年六月。許宗九。馬蹇跟等作亂。劫掠村莊。昌言招勇守禦。數月。會參戎官軍合剿。賊衆設計詐敗奔逃。

松

谿

小

草

至金雞嶺邊。潛伏四起。昌言刀戰殉難。八月賊陷定安城。擄昌言妻陳氏。懋曾三歲。亦陷賊中。陳氏以計誘賊。願從終身。懋曾少恐爲累。請釋歸。賊從之。陳氏遂嚼舌死。縣志有傳。祀忠義祠。懋曾父母俱亡。寄養外祖家。辛苦流離至於長大。讀書聰敏。博學能文。康熙初年補弟子員。文名日起。興復舊業。克迪前光。凡大宗伯祖著作遺稿。保存弗失。重刻行世。登拔萃科。蜚聲海外。性嗜吟詠。與同志聯吟倡和。詩酒流連。傳爲海外韻事。凡宦遊來瓊者。若梁蘭邨。樊明府。吳遂章。李濱江。施澄菴。吳于菴。翁丹溪諸名流。無不投詩相贈。編紵聯懽。其胸懷灑落。大雅不群。卓然成一家言。遂開建江一代風雅。而尤力行善舉。重修建江樓。王氏宗祠。大宗伯生祠。尙友書院。賦詩紀事。後人稱道不衰。又建石浪亭。寄傲軒。讀書教子其中。至老手不釋卷。著有歷代帝王聖賢將相圖傳贊。松溪小草。子宸。拔貢。官河間知縣有傳。

學庸淺言序

松 谿 小 草

夫言非厭淺也。自庖犧一畫。已駸駸乎有日趨於淺之勢。何以言之。陰陽本於動靜。始於太極。易曰一陰一陽之謂道。大學言道。推之於絜矩。中庸言道。溯之於率性。是道始於易也。朱子曰。六經言學。自傳說始。又云。言性始於康誥。言仁始於仲虺之誥。言誠始於太甲。孔子之學。蓋得於湯。然吾以爲得於易也。孔子贊易。彖象文言十翼。仁出其中。誠出其中。卽學亦出其中。固吾以爲皆得於易也。嘗欲取大學之明明德爲一則。新民爲一則。止至善爲一則。致知格物爲一則。誠意正心修身爲一則。齊家治國平天下爲一則。中庸天道人道分別爲一則。以準於易而未能也。丘君雨長出學庸淺言一書相示曰。此予向年面壁所編摩之書也。丘君其思深哉。而以淺言之。亦猶予欲準易之意也。其先得我心也。夫世之支離滅裂者。是忽淺者也。鉤深索隱者。是略淺者也。略於淺而以深求之。非爲不知學。并不知道不知易矣。易易知也。易從也。易知易從。則人人皆可學於道。丘氏之子孫。使寶是編。而毋以淺忽之。則當珍爲琬琰拱壁。其於道也。亦庶

幾矣。

序

八

史評序言

松 昔人以爲處則充棟梁。出則汗牛馬。常苦其書之多。至綜核古今。盱衡百代。舌底筆端。輪輪囷囷。欲吐不出。欲棄不能。則又苦其書之少。若夫自上盤古。下逮宋元。覽先誓之抵衷。考前人之衡斷。其人必精以悍。其氣必安以舒。其神必健以決。惟式翁先生。殆其人歟。先生一日發緘啓匣。手數帙。以示予曰。此予日覽口誦。心維手寫之書。是即予憂患之書也。予受而卒業焉。曰憂患之用大矣哉。昔夫子嘗曰。作易者其有憂患乎。是六十四卦。三百八十四爻。皆爲憂患而作。何況司馬子長。上下三千餘年。凡百二十篇也。班孟堅二百三十九年。凡百篇。皆憤發之餘。爲憂患而作也。今先生上下古今。曠觀百代史冊中。遇聖君哲后。則爲賡歌喜起之儔。遇彥士秀良。則居司徒輔翼之職。遇亂臣賊子。則爲士師司寇之官。遇讒人僉壬。則處以流放誅殛之法。是皆讀史中之作用。是皆憂患中之作用也。

草 小 谿

松

谿

小

草

憂患之用大矣哉。後之子孫。襲先生之書而讀之。則義周之心法出其中。春秋之筆削出其中。史遷班固之詳瞻典核亦出其中。雖以之建侯行師。履豐恒豫亦可也。豈適憂患言乎哉

歷代帝王聖賢將相圖序

閒嘗披覽史冊上。自羲軒以迄宋元之際。三千四百有餘載。以吾之虛懷朗鑒。入乎得失之林。其間爲帝爲王者若而人。爲將爲相者若而人。名臣大儒若而人。善不若而人。于是乎成敗之數明。而邪正之辨得。吾之喜怒哀憂哀。亦出乎其中。爲之喜則人忻然而笑。狂呼以鳴其得意。爲之哀則痛哭流涕。爲之憂則達旦不眠。爲之怒則植髮衝冠。嗟乎。古人亦何事而能移我情也。蓋以人同有是心。則同有是非臧否之鑒別。如讀子虛賦。有憾生不同時之感。論頗牧之賢。則拊髀稱善。孟子曰。是以論其世也。是尙友也。「太史公曰。吾以爲子房其人必魁梧奇偉。至見圖狀貌如婦人好女。孔子曰。以貌

松

谿

小

草

取人。失之子羽。是又論世者之一則也。今其圖俱在。見其崎嶇敦敏。則思開物成務之才。見其潛哲英偉。則思綏乂元元之畧。見其端凝迥拔。則思輔翼廓清之功。其間之純而雜。瑜而瑕者。未免有終始難全之道。朱子曰。自古治日少而亂日多。聖君賢相之所以不數數親也。予家藏舊有歷代帝王聖賢神仙圖。兵燹之餘。散失無幾。康熙戊寅兒辰遊京師。復覩得此卷。上自義軒以至唐宋帝王者。四十有一人。自蒼頡以至唐宋爲聖賢將相者八十有四人。爲上中下三冊。予因爲之考其世系。按其治蹟行實。作爲小傳。并綴以贊。使觀覽者瞭然于臧否之辨。得失之林。臣以告其君。父以語其子。兄以語其弟。囊其所能。而警其所不逮。則是圖也。未必無小補云。

樊侯稱觴序

露貢 王懋曾

嘗考甫田之詩曰。農夫之慶者。上之壽下也。邠風之詩曰。躋彼公堂者。下之壽上也。是知古國君與國人。有交相壽之義。故上之壽下以德。而下之壽上以言焉。曩曾懸弧。侯以父師之尊。專一介走祝。深有得於壽下之義。然

松 谿 小 草

曾一老生耳。其何敢當。又不禁惴惴焉懼。屆茲嘉平月。爲公覽揆辰。思有以壽之。而未有言。適臨紳士暨其邦父老。攜書幣詣而請曰。吾臨昔者屢際兵荒。農輟耕。士廢學。相與流離播遷於哀澤者。其不堪命甚矣。自侯之來。舉從來未有之政。悉啓而經營之。其嘉惠我臨。雖千百圖之。千百記之。莫殫其槩。僅舉其大者言之得十事焉。皆侯平昔所措施。吾臨德侯以圖與記。以紀其實。今欲有以壽之。而侯性又不樂顯者文。子以詩古文詞。見重於侯者。素願乞一言。然恐未悉其所以嘉惠之之事。特舉以佐君筆。幸裁擇焉。曾閱竟謂曰。是即可以壽侯矣。奚以他。且曾亦不復別爲言矣。其侯之建學課士者。詩所謂棫樸作人。思樂泮水者也。聽訟化頑者。書所謂象以典刑。柔遠能邇者也。招徠勸農者。易所謂萬物資生。乃順承天者也。禱雨禁寇者。禮所謂能禦大災。捍大患者也。築隄樂輸者。傳所謂徒杠輿梁。民之悅之者也。要皆王政之大。能與其一。均有利於百世民生。况悉舉乎。且古之歌樂只頌無疆者。爲其有功德於民也。侯之有功德於民。悉千百年無疆之

計。壽莫大矣。寧必效世俗諛詞。引九如難老之祝哉。請持歸以稱觥。以毋失乎下以壽上之義。以上舊志

胡母周孺人八秩開一序

松 谿 小 草

古聖人垂闡闡之訓。有曰先攸遂。在中饋。又曰無非無儀。惟酒食是議。內以闡闡之行。非治亂之途也。闡中之語。非法紀之守也。然鮑司隸宣與其內子少君。齊德比義。並抗高節。宣既盡忠漢室。少君獨壽考無恙。親見其子孫洊陟顯列。史冊詳而錄之。敬美陳勞逸之誠。舉先王之訓。其言近於法制典章。仲尼嘆之。兵明紀焉。曲而不黷。豈徒寵其實行。而思不愆置其語言哉。抑亦明乎得失之故。昭天道。察人事。迹福善惡盈之軌。見履信思順之終吉也。吾於胡母周孺人尤有足闡揚者。胡之先世。自江右宦交趾。航海至瓊。遂擇定而家焉。再傳而至一齋公。明以弘治進士起家。爲江右方伯。開府秉鉞于桑梓故里。蓋亦里數焉。五傳而至明標公。以恩進士騰驥蹏苑。時際滄桑。未獲大展其懷抱。瀛映公其嗣也。瀛映少時穎異。出語驚人。員山

松 谿 小 草

周先生因而奇之。遂以孺人許執箕箒。周爲瓊閣閱。代以進士。而躋顯階。與定隔盈盈一水耳。方孺人之于歸於胡也。車輛填門。媵妾如雲。值鼎革之交。胡氏家道落。瀛映公性復脫畧。不諳家人生產。惟一席豪吟興劇。則彈碁對酒。呼朋滿座。此外不絕聞焉。孺人去鉛華。衣蠹食澹。早夜拮据。入有稽。出有考。絲纒繡絮。罔弗親也。仰有取。俯有拾。僕從長御。罔弗勤也。而且田園錢穀。綜理有方。水旱災殄。儲蓄有術。下足以供衣食之需。上足以應有司之期會。而不至於重困。嗟乎州人士之衰也。右姓卿宗。降在皂隸。良田上腹。斥爲榛蕪。方領之儒。小吏得而呵叱鞭撻者有之矣。而瀛映公猶得保其履道之宅。南陽之阡。啾啾銜杯。迎賓掃榻。以娛天年。孺人之力居多焉。其尤難者。瀛映公中年乏嗣。絕意房帷。孺人多方婉孌。爲置側室。舉一丈夫子。瀛映先逝。孺人力撫孤雛。督使自立。門戶起而宗祊延。卽今士彥也。士彥蜚英庠序。遠紹書香。而孺人春秋七十有一。老而勤儉不懈。嘗語人曰。妻之於夫。地道也。臣道也。地道無成。而代有終。臣則鞠躬盡瘁而

松

谿

小

草

己。老何敢辭。士彥魁然。有子率婦子。希韓鞠臙。上壽康觴。孺人舉之。爲一笑曰止。吾無以荅戚族。嫺姪聞之。莫不賢孺人。而歎天道人事之不爽也。夫鮑司隸之事。史氏詳之。公父文伯之母。仲尼歎之。予司鐸定陽。士彥爲予門下士。更與胡氏有世誼之好。因得詳孺人之懿行。以備太史之採風。而闡發幽光以輔翼教。固將學於仲尼者也。爰爲之序以侑壺觴。

陳亦先七十有一序

古者列國皆有詩。於以驗人心之憂樂。知政治之得失。君子讀其詩。因以考其世焉。詩曰。治比其鄰。婚姻孔云。又曰。既有肥疇。以速諸父。既有肥牡。以速諸舅。蕭蓼之三章曰。宜兄宜弟。令德壽豈。人生爲太平之民。則澶酒醴。烹羔豚。以速諸父兄親黨者禮也。使兄弟既翕。而中外嫺睦。越陌度阡。相與往還。有酒馥我。無酒酤我。登堂介壽。酌兕稱觥。非倖也。亦宜也。予於亦翁陳先生見之焉。先生行年七十有一矣。重光大荒落。清和之四日。爲先生懸弧辰。開華堂。設綺席。列罍樽。鞠臙而上壽。親串盈門。考鐘代鼓。

松 谿 小 草

絲肉並作。和樂怡藹。沛國之友愛。潁川之聲華也。東床佳壻。盧家之龍子。謝庭之玉樹也。長公贊蔡偕其昆玉。福時之諸郎。公沙之群彥也。先生修恬侯之行。太君執敬美之訓。偕老齊眉。衣蠶食澹。早夜拮据。深自降損。循循乎若有所得。粥粥乎若無能也。頤神任運。守柱下之和光。得比叟之晚福。可以養生。可以延年。非先生之德。其孰能之。其德維何。易曰。謙德之柄也。傳曰。儉德之共也。語曰。慎德之守也。先生抱此三德。固宜其食報日豐。眷錫日隆。天之所授。以酬先生之德。又豈有艾耶。予次兒偕長公同叨選拔。聯轡都門。聲氣甚歡。予偃塞自老。編蒲抱甕。獲與先生扶策往還。婆娑於殘經廢耒之間。日銜杯而誦詩。

丘君雨長暨賢配潘孺人六十雙壽引

松 滄溟浩瀚之中。已生名世。金花朱橘之內。復覲耆英。昔是紆朱拖紫之人。已見蜚聲藝苑。今爲餐霞飲澹之士。更足領袖江山。而且賢配偕老。舉鴻案以相莊。子孫繞前。襲班衣而效舞。如我雨長丘君暨賢配潘孺人者。丘君爲文莊八伐後裔。孺人邑侯兩葉女孫。昧旦示交儆之義。瑟琴嬾靜好之歡。振家聲于化離之日。人稱再造之功。積陰德逮垂暮之年。時羨通德之里。教子則膠庠馳譽。訓孫則國器崢嶸。建家廟而俎豆重光。捐祭田而蒸嘗勿替。推子繼兄。報以寧馨之後。懸額示訓。信爲明德之徵。此其大畧。足槩平生。更有高風。能通今古。門無俗客。何殊閉門深山。榻有琴書。不妨垂簾燕市。商歌洛誦。惟是樂以忘憂。酒瀟詩敲。不知老之將至。人擬七賢六逸之輩。夢遊十洲三島之間。當黃花吐蕊之辰。正白髮齊眉之日。金風玉露。羨嗣子之日長。珠闕瓊樓。賀老人之星見。宜爲製錦。詞成萬軸縑緙。正可稱觸。詩誦九如天保。

松 谿 小 草

金蓮菴募化重修大士堂引

佛言西方極樂世界。上有樓閣。以金銀琉璃玻璃合成。繚絡寶珠。盤旋雲極。輝普日月。則極人世之王居宮府。難以媲美。而況木椽陶瓦。土室灰宮。豈佛菩薩之所棲止。甚至傾圯朽蠹。暴風凌雨之所侵蝕。豈世人奉佛菩薩之意耶。獨不思衆生具佛相。佛現衆生相。衆生卽一種血肉佛。合享世間良田美宅。歌兒舞女。肥酒大肉。奉佛卽一種土木衆生。合享世間金碧梅檀。雕鏤棟梁之奉。同譜共胚。供養法應。平等衆生。無古無今。無來無去。無成無住。無壞無空。當其興時。了無一物。當其廢時。宮殿湛然。信耶疑耶拾耶慳耶。要信則人象資金滿八十頃。豈便是的的大意。要疑則六師角持。各現神變。何故肯受屈出家。要捨則祇陀太子捨樹造寺。寺荒廢。樹還復生。到底何曾失却分毫。要慳則如須達長者。賣肉得財。雖致巨富。終遭煨燼。到底何曾留得分毫。直湏八十七代禪師。一同上堂。齊捧齊喝。喚得疑鬼慳鬼醒頭。豈獨豐干能饒舌耶。是爲引

湧玉泉銘

記水出村前

天馬之山。廣陰之涓。有水漸漸。有石離離。挹之酌之。其甘如飴。涵暉激湍。噴珠吐琪。千畦百畝。霑澤旁施。水畔火耨。農夫以時。豈弟君子。江海爲期。涓涓不已。施德之基。既酌斯泉。毋忘此詩。

續龍梅四景

小引

萬松壘

平岡隆阜。一望鬱葱。先公丘壘在焉。春露秋霜。興懷孝思。細雨疏風。忽聞虬龍。其憂雲裂石聲。不異山谷所云。盤空作風雨發地。鳴吹也。豈特柳下李之壘云。

龍梅壘

環龍梅居。左有辛律之峯。右聳峻嶒之塔。形家以爲對峙華表。昔人所謂龍跳天門。虎臥鳳閣。題曰龍門。會王父宗伯所命也。暇日登之。可以數遠峯占雲氣。有俯視一切之槩云。

松 谿 小 草

松 谿 小 草

寄傲軒記

士君子必有燕居退息之所。所以遠夫庖湢戾瘴。醺醺赫紱之屬也。予搆先人之廬於松谿上。西嚮更營。北編數椽。而南其牖焉。稍東闢小圃。雜藝松檜蘭菊。扶桑冬青。直北置經十三家。子八家。史四家。詞賦三家。當其朝曦昕朗。主人啓東扉。以觀曉露之晞。含蕊吐芳。挺姿競秀。燦然在目。及薰風報爽。入戶徐徐。啓南牕讀書。丹黃其句。字權而句衡焉。法脩於經。是用由經及史。趣通于子。由老莊荀韓以窺屈宋李杜。奉以爲程。不必中程。倦則步于庭。閭里往來不絕。反室閉關。寂如也。客曰。優哉游哉。主人曰。此予之所寄也。因有取于彭澤南牕寄傲之意焉。世之美室者。徒炫其觀。求寄不得。尋丈之地。不啻勝之。蓋先公卜室焉。嘗欲於邑郊搆一畝之宮。且耕且讀而未能也。曰寄之。因執筆記之。

重修廟宇題名記

管子曰。順民之經。在明鬼神。祗山川。敬宗廟。恭祖先。不明鬼神。則陋民

記

松

谿

小

草

不悟。不祗山川。則威令不聞。不敬宗廟。則民乃上效。不恭祖先。則孝悌不備。甚矣。治民事神。其道恒相需而不缺也。那危鎮。原有南天火雷娘娘廟宇。閱久剝落。雖歲臘牽牲獻醴禱祀續紛。然懷桷傾圯。雨矢風輪。斜飛迅捲。神之怨恫實甚。譬之人雖豐衣足食。肩鍵不備。屋漏淋淋。未免眉低色削。歲在上章。執徐先明肇授之月。山川濯濯。原野荒荒。旱魃爲殃。而同祿之焰張矣。閣鎮商民。皇皇無告。疾首痛心。追維夙昔之愆。而虔禱於神。巡宰陳公亦齋宿謁誠。爲民請命。修桔槔。蓄水具。備鉤鎌。時時嚴警。其患始息。爰鳩工庀材。重修火雷娘娘廟宇。以邀福庇於鎮。實治民事神之要務也。是役也。創之者若而人。董其事者若而人。咸出財出力以効涓滴於神靈。落成之日。龍梅王子瞻拜堦墀。整如鬱如。潔牲脔。具胾鄉。僂僂鞠踖。歷階而升。神貺昭答。靈風肅然。易曰受茲介福。于其王母。又曰視履考祥。其旋元吉。其諸善信輸誠謁虔之謂也。是爲記。

小影自贊

晏坐胡牀。手展長篇。目如望羊。契義皇前。欲探淵明菊。成章子雲玄。時而學佛。時而學仙。噫嘻。誰氏之子。先得我心之所同然。

具此鬚眉。自立崖岸。鼎鼎百年。韶光轉換。魂壘難消。雙眸爛爛。說劍談詩。飛揚扼腕。撫今追昔。旦而復旦。優哉游哉。展卷長玩。

陳亦先像贊

穆穆其儀。莊莊容上。彼何人斯。深衣赤履。目如望羊。粲然高視。見其學易。心晤化理。于焉投機。採芳擷芷。彼何人斯。呼之出紙。憶其少年。巖巖皐比。青紫浮雲。世事彈指。時乎不來。而今老矣。

題周端臣岳翁遺像

有叟碩然。其腹便然。噫此叟者。彷彿乎二十年前。沉酣乎藝圃。精研乎硯田。經雲組霧。咳噉九天。斯何爲乎。徒倚於淇澳之側。兀坐乎危石之邊。其

穆如風。其靜如淵。手持一卷。得魚忘筌。豈其茹真養性。知白守玄。予嘗追隨白髮。周旋於几杖之前。

松 谿 小 章
祭張君威字文

歲在疆圉赤奮若。清明節之莫留二莢。爲歲宇張表兄八秩開一之辰。親串盈門。賓僚在座。諸郎陳萊階之舞。群孫繞鳩杖之前。帑鞬鞬而上壽。表弟懋曾亦擬與獻祝。末越翌日。而兄疾篤矣。莫莢飛盡。而兄以壽終。何其于生死分段中。了然無碍。一至是也。越有八日。弟始撫其柩而問故焉。諸郎斬然衰絰之中。揮涕瀝瀝。爲弟道兄夢中事。越伏日癸丑置。牲於俎。置酒於樽。香楮庶羞之儀具焉。因爲文以告之。謂人生一大夢也。黃帝夢風力。殷高夢傅。孔子夢姬尙己。高憲張敏。夢中相尋。不識路而返。若因羊夢馬。因馬夢輿。旗蓋鼓吹。身爲王公。則魂之遊。非精神之極至矣。昔莊周隱几喪我而夢爲蝴蝶。栩栩然蝶也。俄而覺。則蘧蘧然周也。揚子雲僞臥夢五

松 谿 小 草

臆吐出。手自收納之。撥去其滓。吞之而覺。兄其一夢而遽驗耶。朱晦翁夢中之精神。與天地相流通。晝之所爲。夜之所夢。其善惡吉凶。各以物至。若孔子兩楹之夢是已。弟嘗以爲人生之大夢有二。富與貴。而壽考子孫不與焉。有力可以禍福一世。而不能保其年之永。智可以藏否萬物。而不能必其子孫之賢。蓋可爲者人事之偶然。而不能者天道。不可以智力動也。彼非不鮮衣怒馬。夸耀閭閻。粟餘於囷。帛餘於藏。犬馬牛羊。非不餘於家。不旋踵而身命殞滅。子孫多不可問。吾以爲世人常在夢中。而兄常在覺中也。覺而夢非夢也。以覺爲夢。如泡如幻如電如影復如夢。夢而如。非夢也。如而夢。眞如矣。兄際鼎革之會。卽稍策高足。亦可以躋雄班登臚仕。而不肯羸糧躍馬。投牒以目進。惟讀書談道。以明經老於嘉湖之上。忍嗜慾。捐玩好。不與時俯仰。以治家人生產事。守柱下之利光。得比叟之晚福。願神任運。可以養生。可以忘年。開賞月日。吾瓊人物。每以兄爲福人。而首屈一指。豈非廉靜止足。留不盡之澤。以貽子孫。以終壽考耶。今者九子七孫。惟內

松

谿

小

草

惟外。環樞而哭奠者。亦惟思其居處。思其笑語。思其志意。思其所樂。思其所嗜。弟欲爲兄作招魂之章。此悲噴之詞也。弟欲爲兄作薤露高里之曲。此輓死之恒也。亦惟有思其居處。思其笑語。思其志意。思其所樂。思其所嗜。爲詩十二章。使知音童子。日誦靈側。以侑朝夕奠之觴。兒戾曰。無論其他。卽子落枰間。伯翁呼之欲出。嗚呼。豈不可思。如之何不思。

祭符儀山先生文

嗚呼。先生往矣。先生之典型。其誰嗣續耶。吾儕束髮受書。侈口動談黃農虞夏。及當吾世。而有貌古之貌。心古之心。行古之行者。如夏商鼎山壘犧象之文。魑魅饕餮之狀。目瞠舌舉。而不能辨。其下焉者。鮮不以爲迂且異。而怪且咤焉。吁。若是則必毀方爲圓。容頭借面。趑趄逡巡。如腐骨之載朽肉。淒風之萎殘葉。便便葉葉。以爲通方豁達之觀。然能則古稱先。澡身砥行者。視之其迂異怪咤。又幾何也。先生其貌古之貌。心古之心。行古之行者歟。開嘗軒而論之。以爲大丈夫不能居廊廟。而霖雨八荒。使得專師

松 谿 小 草

儒一席。左圖右史。教授生徒。其成就匪淺少也。先生弱冠魁梧英敏。即潛心制科之學。其爲文大約原本經術。湛深理解。鑿鑿乎如五穀之療饑。藥石之治病。其波浪濤洄。崢嶸磊落。則出於楮墨之間。屢躋棘闈。艱於一第。僅空傳師儒之職以終老。然先生開絳帳。坐臯比。其執經問難者。比孔門而半其徒。蓋五十餘年如一日也。予嘗訪先生於館舍。見其橫經列席。燈火熒熒。誦聲朗朗。響振林木。應四方學人之叩擊。隨資開導。如行大露中。不自知其濡濕。卽窮鄉陋壤。田夫野叟。無不知有儀山先生云。先生存誠主敬。不欺暗室屋漏。卽童稚孺子。未嘗不衣冠而見。良夜開卷。閒房點筆。紙牕竹榻之間。必焚香肅坐。始對聖賢。嘗教人曰。此吾儒主敬之學也。終身之喪。持之尤篤。父母忌日。必素衣冠以處。儼然如見。愀然如聞。疏食戚容。未嘗少懈。念古人遶墓而啼。攀栢而泣。未嘗不膚慄骨驚。使人廢蓼莪而不忍讀。人曰。此先生之教孝也。諸生弟子。有單寒窘乏者。必爲之授室授餐。謀衣食具膏火。又爲之多獎掖。以裁成而樂育之。曰吾庶幾古人爲國家養士意。

也。凡有急難。爲周恤而排解之。時者或許以情來。而先生不逆也。至酒闌燈熄。談及古今人才節槩。與夫經奇俠烈。福田因果之事。齒頰津津。而先生勿倦也。今先生往矣。思先生之貌。思先生之心。思先生之行。先生嘻笑嚬呻在焉。先生之警咳容止在焉。先生之眉宇心腑在焉。即不然而更闌人寂。斗轉星稀。流泉曲徑之間。先生之典型。豈不可思。嗚呼。如之何不思。

祭王漫叟文

草 小 谿 松

嗚呼。世何可無超曠閎覽。修行淹雅。玄寂寥朗士哉。如夏鼎商彝山罍犧象之文。世不恒有。而斷不可無。後生小子。目中何由覩先民之法物耶。公厭世仙遊。少伏生之五歲。代歷兩朝。桑滄遞易。公之閱人。如大椿之視朝露。人之視公。如祥麟威鳳。羨爲盛世羽儀。而獨爲公所不滿者。萬一以公之才之學。正宜人侍金華。佐黼座以進退人才。斧藻皇猷。出則擁高牙大纛。盛騶從以肆治遊。風流跌宕。磊落胸懷。侈然而開華堂。徵歌命酌。自謂可以長享富貴。一朝有事。棄妻子。如遺屣。此天之所以假英雄者。奈何曾不一

松 谿 小 草

有。而僅以明經食其報耶。吾見世之狡獪者。軟骨者。摩沓感施者。椎鄙貪婪者。逶迤富貴白首。門祚鼎盛。子孫繁昌。則何說耶。噫嘻。我知之矣。富貴壽考。盛德大業。四者造物之所司也。夫履豐處厚。殊功偉伐。台背黃耆。揆藻擣辭。焜耀炳烺。皆造物之忌也。有道者之所不可兼取也。四者之間。孰豐孰膏。孰絀孰贏。造物其以豐與贏者。予公尙何不滿其願耶。姑無論其他。卽如四座颯沓豪座。並陳文學好修士。娉娉金玉。屑而出之。上光廟峙。下擘方輿。懸書國門。藏草名山。此將屬之寒儒乎。將屬之市上豪乎。彼以僉面椎顙。而沐瀉膏馥。此以靈心偉手。而把爽清芬。我知其無當也。今公之詩文俱在。其正者如布帛菽粟。其奇者如怪石偃松。爲古體蒼然。爲近體鎬然。光采奕奕然。風骨冷冷然。法無不比。律無不中。神無不傳。情無不充。而總之歸于沉鬱朗暢。折頓清饒。公之未了于中者。亦有三事。十年前欲爲米家書畫舫。筆牀茶竈。酒罍釣筒。往來於朱厓煙波建水間。此世外之清福。上帝所靳也。嘗竊嘆曰。有生必有死。暫聚者必終散。味味我思之上自

松 谿 小 草

頭顱齒髮。下自肩骨腰膂。何者爲可籍。何者爲可恒。乃欲長生久視而不死乎。間古有虞殯之章。蓋群歌以送葬道途。與其施諸死後之鬼。孰若予親見爲之快。此志隱隱逮後。至其所作詩文。快心嘔血。未獲登諸梨棗。以告於朋友。播諸同人。其往者不可追。而此秘之匣中者。斷斷不容掩抑。之子若孫。善繼善述。必有闡揚幽隱。搜訪遺佚。弔古興懷之士以傳之。公其母急訴于帝。使六丁六甲神挾風雨以掣飛。此海邦之文獻。兩朝之模楷。而即公之所以壽而臧。耄而勤。以答上蒼。以報朋友者。皆此志也。齒豁雖陳。靈明不滅。庶其含笑以聽予言。

詩

古珠崖

松 珠崖誰啓土。周秦在南荒。漢始元鼎間。畧定畫其疆。繡錯與廣野。築保嚴
谿 守防。初元議罷棄。叛服屢不常。建武中興後。來享復來王。治所隨徙遷。爲
草 城復於隍。我欲探古跡。雲氣鬱青蒼。江光開一線。島嶼互微茫。捨舟逐朝
小 敵。瞻言涉崇岡。四望空延佇。村落湮際藏。騁步入荒原。或謂穴頽墻。斷碑
臥苔蘚。璇題糾新篁。遙憶締造初。棟宇開堂皇。椎髻易窈窕。鰲面變冠裳。
中原宦遊至。僑居樂此鄉。操觚學紉誦。天路奮騰驤。鼎鼎千百年。閱却幾
滄桑。回首念疇昔。徒使我心傷。未央與銅雀。至今委秋霜。

別友人梁蘭邨

十載知交常相見。一朝將別倍綰繼。紙窗竹榻啜苦茗。累日與君共筆硯。知
君氣意倚天高。凌轢百代文章豪。時有雅句遺珠玉。對之眞覺飢醇醪。此中

松

浩瀚有真氣。本原漢魏追風騷。非如時流競著作。秋蟲鬪響徒勞勞。知我兀
稟存骨力。更念世誼同膠漆。招呼過我坐園亭。揮墨離奇光錦帙。沙黃日白
風颼颼。會難別易真堪惜。對離筵。憶疇昔。縱論千秋增太息。君不見。聞鷄
起舞何豪雄。臄臄直欲駕長風。又不見。捫虱高談真氣魄。旁若無人志揮
霍。酒酣耳熱神飛揚。腰間寶劍露霜鏑。入座爭迎作賦才。剪燭屢呼金鑿
落。豪華得意有真樂。莫令時人笑寂寞。吁嗟乎。黃鵠高舉秋空秋。俯視如
雀鳴啁啾。奇文百軸無知者。相期酌酒百花洲。洲上花開樽前酒。天邊浮雲
幻蒼狗。底事空拋歲月過。生平許可誰歐九。願爾共磨冰雪心。須與當世期
不朽。

谿

小

草

梁蘭卣爲予作松石歌以答之

撫松踞石發奇想。白日颯颯來幽響。君今爲我一揮毫。狂飈欲作天風號。汝
生何爲托枝幹。巉巖之上雲水畔。鱗鬣是龍數尺長。怒張孤挺在天半。凡物

松

英拔罕所見。惜汝恐豪樵斧賤。置身絕巘與雲齊。岷強之態不少變。由來此物不可羈。嶽崎磊砢正相宜。魁梧奇偉髯如鍊。矯然負俗疑人傑。蘚繡苔封顏益好。潺湲流水同幽討。初平叱起不能行。米顛若遇堪絕倒。松兮松兮雪滿林。相期共此歲寒心。石兮石兮何嵯峨。一片堅貞可不磨。君今爲我寫松石。我更爲君松石歌。

谿

松

小

種松南岡上。岡上草芊芊。溪光交樹色。好鳥自翩翩。虬龍纔數尺。挺臥在孤煙。閒來携短杖。芟去藤蘿牽。春風相慰藉。生意忽蒼然。我時發豪興。直欲踞其巔。龍鱗動之而。飛騰不可攀。

草

寄題試劍峰大小洞天

炎荒多名勝。奇關推吉陽。萬峰億岫此叢聚。俯瞰大海何茫茫。唐宋名人相代興。宦遊展齒頻攀登。使君潑墨題巖石。海陵周郡刺史劉字留峻富川毛奎當時好。

詩

松

谿

小

草

事推名卿。盛代風流莫與京。閒嘗披讀毛公記。有大小洞天記磊落崑壑移我情。洞名

大小開日月。玲瓏直可鑑毫髮。几席布成位置工。引領遊人暫休歇。有石刻曰行休

下有巨石如砥平。名曰崑瞻出硯硯。轉自西偏徑曲折。山峽谿澗步千尺。杖

底旬旬雷發聲。崖間洶湧濤崩屋。忽觀浩瀚驚寥廓。海藏龍宮失扁鑰。奇珍

雜貝巖上生。蛟蜃鯢鮪谷底躍。峰頭正有石室存。峰有石軒敞瞥見絕壁成斗削。

遊人到此搖神魂。崑嶠何地能住脚偶憑巨石瞰滄溟。大書釣臺毛公鑿。此

中岬嶠萬峯矗。旁無附屬露斷澗。石穴涓涓吐玉泉。有石井不乾不溢味甘而冽堪一

勺。古樹槎枒多刺桐。三月花開遍山嶠。或似霓旌飛碧落。或似祥雲裊嫋

約。峯迴窈窕入幽壑。有石如船崖上泊。有石船長丈餘挂壁上遙想初是馮夷宮。世變

滄桑成高閣。不然奇嶽絕攀仰。仙梯查查不可上。石從絕處刻曰仙梯從何得有艤舟

來。忽向此間繫雙槳。一百五十七字鐫其巔。昔賢游此留眞賞。周使君刻石船上東有

一峰如卓錫。瘦削稜稜露奇剔。糾髯奮角肆盤旋。煙靄冥濛纏霹靂。傳言知

松 谿 小 草

是試劍峰。或說諸峰莫與敵。我按圖經作臥遊。歷歷揮寫山靈幽。何時策杖躡芒屨。采真抉險恣搜索。披薜磨崖續舊題。峯頭當踐浮丘諾。

戊寅清和月喜八閩老友燕及偕諸子過松溪
遍探名勝爲揮六圖紀遊作此誌盛

半生素負煙霞骨。夢裡飛騰上突兀。柴門無事晝長關。興懷好友如饑渴。著雍攝提清和辰。偶來老友自八閩。瘦削稜稜冰雪格。虬髯皤皤白似銀。揮我煙霞十數頁。解衣磅礴妙入神。一筆一呼一狂叫。蒼松翠壑石鄰鄰。有時置我雲烟裏。好同摩詰畫中身。有時置我長松下。還似餐霞臥石人。興酣勃勃更無前。賈勇直凌文筆巔。指點煙雲紛錯落。乘興又復聽鳴泉。採藥邛蹊逢饁婦。兒童笑指爲神仙。雄心未降思騁騰。紫韁玉勒入峻嶒。歸來瓢笠松間坐。石上談空如老僧。斜陽返照柴門夕。牽裳濯足石稜稜。此間妙有眞山水。壁上非徒揮絹紙。君具邱壑在胸中。含毫信得丹青理。君自奇崛不可

松

當。豈終鬱鬱蓬蒿處。丈夫原來不易測。或作英雄或兒女。君不見、上書不踏金華省。蒼頭瘦馬衝沙冷。又不見、拔劍不割金門肉。老守殘僧歸折足。豈同俗輩爭雄研。轅駒局促誰相憐。男兒結交重意氣。錢刀馳逐胡能然。

戊寅冬懷兒北征

谿

孟冬初就道。載馳復載驅。過都與歷邑。川原正鬱紆。霜風冷敝裘。寒雲沒荒墟。濁河凍不流。泥滓霑人鬚。僕夫起長歎。僵臥息微軀。人生稟愚拙。循分安田廬。胡爲恣長征。倏忽遊帝都。帝都何迢遙。遠道艱且虞。倚閭時騁望。對之空踟蹰。

小

其二

草

冬晚氣愈肅。戒旦風怒飈。北地苦寒早。飛雪集枯條。陰雲連斗極。岡阜川塗遙。循行歷層曲。木落增沈寥。踈林見鄉聚。烟火蔽岫嶠。道逢客子還。結駟正聯鑣。相揖立路隅。共言心中忉。人生各有志。鵠鳴笑鷦鷯。還征自茲

始。何由解鬱陶。

雨中觀壁間書畫憶亡友

松

谿

小

草

老蛟作怒陰風吼。白日龍蛇壁上走。煙嶂層巒咫尺間。銀鈎鐵畫誰抗手。主人偃臥似凍蠅。中懷反側思我友。咄咄誰揮薛濤箋。逼近二王氣力厚。雙峯先生之後人。饒培風瓊崖北郭開戶牖。花木扶疏閉一隅。四壁蕭森藏二酉。秋來竟赴玉樓召。人間英物不能久。數載纏綿有故人。晨夕最喜伯鸞親。梁蘭村刻燭分題過午夜。長篇短什動連旬。書生不解錢刀逐。瘴雨嵐煙甘獨宿。病入膏肓不自瘳。一團白玉喪山隴。八閩畸士來何暮。青牛幾夜函關度。李際青邂逅相逢握手初。傾譚遂把胸懷吐。爲寫琅玕千萬枝。墨汁淋漓新尺素。人生最似芳樹妍。花開適值雨風晨。紛紛飛落無知數。半在枝頭半委塵。又如浮雲生頃刻。白衣蒼狗幻無極。忽被長風着力吹。來踪去跡無消息。我日對之感慨生。夜夜靈光照西壁。

詩

松間挂笠

許由惟一瓢。飲訖懸樹端。風吹瓢有聲。棄去無爲煩。胡爲信天翁。日日聽松風。豈是黃農遠。禪讓難再逢。解笠松間挂。放浪隨虛空。風吹耳不受。葆光惟嚙聰。何況臨淵洗。愈覺清塵容。卓哉陶貞白。謾謾松下風。

贈東河友人吳遂章

草 小 谿 松

之子東河彥。抱璞蘊珪璋。俯首理章句。咀英擷其芳。連年博升斗。幾忘歲旱荒。果此珠璣腹。成爲錦繡腸。白日任攤飯。談經據胡牀。時無王景畧。捫舌徒徬徨。我欲往從之。雲水空蒼蒼。細維締交日。負氣各昂藏。君獨樹赤幟。鑿苑恣騰驤。馳驅班馬並。跋扈時飛揚。常於瑤函內。細繹篇與章。斯文應未墜。吾儕當共商。鴻溝如可割。裂土各爲王。

石浪濯足

丈夫壯氣凌斗牛。何必鬱鬱坐林丘。咿唔囊牖自朝夕。寄生天地同蜉蝣。胡

松 谿 小 草

不左攜黃金篋。右持白玉鉤。不然鉤熬東海上。不然射虎南山頭。數者不成復不去。袒衣昂首空悠悠。噫嘻吾知君勿憂。吾看世事等浮漚。嵩山嵩蒲東山屐。不妨遨遊遍十洲。遇着洪厓同笑傲。偶訪東公較壺籌。歸來聊坐磯邊石。松風向我聲颼颼。那知方枘與圓鑿。何論南轅并北舟。爽氣遠山悅吾目。吾且濯足萬里流。

懸崖聽泉

水勢蕩山山石裂。涓涓玉液流石穴。夾岸高峰不肯降。突兀峻嶒任水驚。旬殫濛濛天亦驚。百道寒光飛白雪。大珠小珠落玉盤。長聲短聲幾曲折。丹崖鳥道共躋攀。與酣賈勇忘微蹕。耳根淵靜最堪憐。返照嵐光互明滅。我携瓢笠踞其巔。日日泉聲聽不竭。

題董宗伯書畫冊

先生天下士。文章之宗工。一時盛名馳海內。揮毫潑墨傾群公。吾祖衡文當

詩

松 谿 小 草

己丑。先生傑出冠南宮。自後玉堂金馬中。淵源意氣常相通。風流當代爭矜尚。染翰經營不可狀。片蹠聲價重連城。卓犖才名誰與抗。欲乞千金不易求。墨寶流傳世無兩。只今眞贋半人間。鑒賞孰知筆法上。此卷珍藏久弗失。銀鈎鐵畫應無匹。釵股溜痕不足多。盤旋奔放眞超逸。層巒疊嶂更淋漓。雲影風光照一室。風雨疑從腕底收。寒濤石澗聲颼颼。名人結構不易得。保守已足傳千秋。吁嗟先生生不偶。獨步蘇黃張趙後。吾家簡冊半銷沉。惟此遺墨垂不朽。

冰霜節操歌爲吳明府李太君作

昔時讀女史、鬚眉迥難比、今聞李太君、卓卓能超羣、太君年廿三、茹荼常自甘、哀哀未亡人、孤幃忘苦辛、霜風咽落葉、夜月飛青燐、良人長訣日、孤兒誕生辰、間關歷險阻、旅襯憑一身、丸熊與畫荻、耿耿報良人、良人獲瞑目、忍爲苦節臣、養就千里駒、汗血空冀區、馳驅在皇路、聲名揚帝都、天衢初展足、花縣歌來蘇、袞職將待補、彩鳳鳴高梧、回憶孀棲日、願爲反哺鳥。

空念古臯魚。樹靜風常呼。母也嚴且慈。教養時兼施。羽儀在閨閣。重泉掩玉姿。鬱閼三十年。血淚灑青絲。懇勤誦冰操。爲讀栢舟詩。

李濱江廣南遊歸舟泊瓊島握手言歡道及廣

南之盛爲賦廣南八詠

選四

何必大荒外。朱崖駐客槎。懷奇多攬勝。興盡即還家。書劍浮星漢。風塵閱歲華。丈夫空鬱鬱。那得飯胡麻。

其二

波濤萬里外。一葉片帆輕。舟過魚龍窟。人同犀象行。國中犀象最多人能馴擾貨通銀豆市。花滿竹棚城。勿復耽遊興。蘇王識姓名。

其六

數幅綵綃絹。披來曳地長。女人喜著白綾裙長曳至地論丁誇漢產。國中論丁誇綵備與中土人生男報

詩

名免輸邀客上胡牀。喜邀中華人入家延款寶馬馳金勒。朱顏繫寶璫。紀嬪耳繫璫環可值千金豪華爭趙燕。惹得少年狂。中華人到其地晉不歸

其七

醉墨淋漓興。揮毫遍粉牆。碧紗籠彩筆。濱江題詩寺壁廣南人以碧紗罩之筆架勸壺觥。策士同唐制。國王制科以詩取士彝姬異漢妝。錦甌春晝煖。艷冶濮歌桑。國人延客日中設榻以臥盛陳衿枕環侍女姬至晚秉燭方爲設席以飲

題韓夫人撈月圖

天邊皓月光皎皎。疏星數點銀河渺。珊珊環珮出瑤階。空中月上青山小。玉鏡開來影正圓。恰逢三五門嬋娟。班姬雪練裁團扇。供奉杯深好放船。對景徘徊攀桂窟。分明見是天心月。影倒一輪光忽浮。璧合雙美景相接。姮娥有意向予言。原來相証是前身。欲鑷天根人銀漢。步虛清夜無

松

谿

小

草

纖塵。雙手掬來光不定。瑩瑩一片看明鏡。不離不即常相隨。是色是空互輝映。雲影波光無刻休。閒消今古幾人愁。紫塞征夫望遠道。江頭思婦怨高樓。樓頭見月懷中入。此夜姮娥還似妾。有緣相遇定相憐。好向波光拾紅葉。

東何心斗

人生至樂惟詩酒。到處醉吟酌一斗。此生兩者最難兼。步兵彭澤是其偶。子瞻善吟酒不空。好藏美醞供好友。君今善飲復善吟。上擬古人今未有。每逢歡場對舉杯。君常興至傾數缶。高談雄論四座驚。長篇短詠信衝口。時時寄我金玉音。未能裁答愧寸心。安得挽君常促膝。聚首欣來朋盍簪。待我高築糟壇並詩社。與君對酌共聯吟。

十月海棠花開瓊庠爲瓊山王明府贊作

石榴原來自海國。海樓海柳海上花。海棠移種從何地。不知何年何日到中

詩

松

谿

小

草

華。此種亦與秦蜀異。冰姿仙骨多雅致。奇葩郁郁香益清。垂絲冉冉娟且媚。更有苞萼附蒼枝。挺挺直幹何瑰奇。此花非紅亦非紫。瓊玉作枝雪作肌。臨風旖旎嬌無力。朱明令節是花期。歲歲看花凡幾度。初冬忽報花先吐。連英爛熳見花神。放者居中含者附。宮牆絳帳是花幃。玉砌朱闌是花路。不讓梅占百花魁。此花獨捷爭先步。正當堂廡煥然新。重修學宮落成醞釀天香頭角露。偉哉冀北王明府。牛刀小試來何暮。廢修墜舉育羣英。此花兆瑞在寒洹。爲向花前澆一杯。花之先放知有故。爲家禎祥國休徵。使君優優善政布。庶幾報最上上考。佳期莫把花神誤。

贈雲載青

壯齡同遭世多難。滿地兵戈遠避亂。君爲泥塗溝壑嬰。奮翮南溟振羽翰。今皆視茫髮蒼蒼。回憶當年曷勝歎。維兒與姑權所宜。姑已耄矣兒同攜。棄姑無復姑終養。棄兒兒原是熊羆。間關險阻更幾變。三十年來識母面。母也莞

松

谿

小

草

梵守孀居。豈料孤兒重眷戀。登堂驗痣驚閭里。此事奇蹤傳海甸。予也三齡
怙恃亡。陰陽阻隔無由見。聞君此事摧心肝。同歷艱危母聖善。慈悲感格一
念虔。迎養葬終子職全。古來大孝動天地。奚止嘖嘖人稱賢。修譜建祠承母
志。鞭石成橋利行人。親恩欲報真罔極。人間誰得與比肩。去年惠我瑤華
什。珠璣璀璨長成篇。今我一讀一字淚。自愧早抱恨終天。吾友爲君撰奇
序。好人奇句長流傳。

七星嶺

芙蓉天外落。蒼翠望中來。障海兼天湧。乘風波浪開。南溟連八極。北斗映
三台。真可酒漿挹。滄洲作壽杯。

中秋阻雨步樊明府韻二首

欲放山陰棹。溟濛鎖寂寥。雁聲沈遠浦。蛩語訴深宵。桂影浮雲掩。朱絃待
月調。何能生羽翰。飛看海門濤。

詩

雲月偏相妬。烟深在薜蘿。祇慳詩酒興。翻憶雨風多。倚枕空延佇。虛懷竟若何。此時誰共語。起舞自婆娑。

上灘

硤利如戟。舟師努力難。衆流穿伏石。雙槳激嚴灘。奮迅湏全勇。安危寄急湍。欲知履險益。戒慎寸心殫。

下灘

瞬息能千里。輕撓發嘯歌。隨風飛破浪。去艇疾如梭。有客欣爭渡。何人砥逝波。一篙持在手。遇淺莫蹉跎。

移花就雨

一片景空濛。霏微雨自東。根苗依造化。人力補天工。疏點沾雕檻。輕涼散碧叢。欣看生意足。庶物盡龍葱。

草

小

谿

松

松

谿

小

草

巖下村雨宿

四山垂雨脚。馳馬入荒邨。煙濕亂雲氣。泉流漱石根。桑麻蓬戶暗。甕牖月痕昏。相約明朝發。晨征好共論。

答漫叟

開篋讀君札。知君憶我深。消愁聊遣興。薄醉即微吟。懷友當良夜。臨風寄素心。長松風謾謾。佳景好相尋。

石浪亭落成

幽棲聊避俗。餘意偶有亭。石怒如雲湧。浪飛似建瓴。山花朝氣馥。潭雨夜來醒。杖履時同坐。還能醉醺醺。

友人吳子菴郵致新詩有池十畝構軒臨焉命以名齋偶記杜陵有殘夜水明樓之句聊以

詩

詩

四六

水明額之不知軒中人午夜讀倦四壁無聲
斗轉星稀水明之致果有當否當爲予道之

高軒臨水際。殘夜見空明。螢火流深碧。輕風起綠萍。攤書消永日。索句伴孤榮。每誦杜陵什。聊應額此名。

丙子八月廿三日颶風

坡公留海外。慇懃賦颶風。赤雲扶落日。斷澗飲殘虹。盛怒土囊口。吹翻錦繡叢。連綿過日夜。人語在空濛。坡公賦云斷電飲海而北指赤雲夾南翔此颶之兆也

候渡

浩淼真無極。舟停何處灣。客喧人競渡。風靜浪潺湲。水映村邊樹。雲開雨後山。輕帆如畫裏。小立意幽閒。

丙子九月登文筆峯

秋老容逾靜。秋山迥不羣。遠舒千里目。瘦削一峯雲。煙歇鳥聲散。巖幽日

松 谿 小 草

影。登臨看不盡。披藁讀碑文。

聽友人談遺事

相逢談往事。入耳最難聽。碧血埋今古。遺文燭日星。覆巢新落淚。頽瓦舊趨庭。誰握如椽筆。還應照汗青。

不寐

夜寒渾不寐。吟苦爲愁多。文字生前恨。知交患難過。少開新壁壘。老畏舊風波。寥落成何事。還思酒力酡。

扁舟曉汎

鼓櫂入青冥。山雲四面橫。樹從波底出。人向鏡中行。鷺宿團沙聚。泉流激石鳴。朝光渾欲攪。兀坐有深情。

寄題澹庵泉

誰鑿一泓雪。豐碑紀澹庵。氣真酒酌異。味埒醴泉甘。諫草傳天下。奇蹤播

詩

斗南。取携原不竭。清碧映山嵐。

文峰覽勝

欲看登山屐。攀躋到翠微。山光團四野。竹徑掩雙扉。策杖窮巖壑。停鞭賞夕暉。此時乘興盡。踏月馬蹄歸。

題蓮華庵

漸與白雲近。僧寮許共棲。狂奴仍故態。過客有新詩。夜靜泉聲細。峯迴日影移。昔年曾有賦。此地最爲宜。

過雲齊灘

孤舟爭怒石。全力制危灘。勢撼青山動。聲連白日寒。盪胸流倒峽。出險慶安瀾。不歷艱夷過。誰知天地寬。

太平道中

昔人遊此地。肇賜太平名。曲磴千重折。晴峯一帶橫。參天浮樹影。落磧聽

泉聲。車馬匆匆過。崎嶇不易行。

海安即事

聞道鄉關近。愁懷旅次開。江山看露隔。波浪逐潮迴。戍鼓分南北。風颿辨往來。安瀾如可待。正羨濟川才。

奉和樊明府重陽登高四韻

看山饒有興。天際斷雲封。雅集酬佳節。豪陰寄遠峰。寒煙浮几席。高論豁心胸。如此真稱快。何時可再逢。

寄懷葉蒼崖

一廬聊寄隱。喧寂豈邀名。曠達同中散。和光似步兵。開樽常滿座。得句傲長城。每獲聆高論。床頭劍欲鳴。

步張卓盈見贈原韻

木葉蕭蕭下。吟風落藕池。人酣千日酒。花老九秋時。性拙偏耽懶。才疎任

詩

數奇。屢承珠玉擲。共羨季常眉。

庚寅仲春訪家元有山中茅齋

林幽峯更碧。一壑蔚然深。野水爭石澗。山花養道心。長年依鳥宿。永夜伴蛩吟。得力資精進。聯翩惠好音。

登蒼屹山

玉龍盤曲到清谿。指點蒼苔鳥道迷。萬頃烟波臨海澗。千家雉堞與雲齊。碑留古識遺蝌蚪。石鑿方城掛斷霓。攬勝豈徒增嘯傲。含情冉冉夕陽西。

約梁蘭邨同登建江樓

握手相逢好共論。蕭蕭落木大江奔。樓頭月色常留影。岸上詩情慰斷魂。腰有煙雲窺筆墨。愧無束帛到丘園。知交何忍輕離別。同聽秋聲酒一樽。

其二

夙昔精懷每服膺。江干高閣好同凭。文通綵筆花常放。君冑新詩興倍增。晚

松 谿 水 簾

渡急歸返照人。遠山含碧暮煙凝。登樓正可談心曲。別後何堪永夜燈。

走筆柬蘭邨兼索題箋

惠我琳琅足好音。芝蘭氣味費追尋。風高每作登樓想。花靜全生閉戶心。早有文章驚海內。祇緣翰墨學山陰。知君旅榻渾無事。濯硯鍾王試一臨。

初冬偕梁蘭邨郊外訪友馬上口占

同人攬轡出東郊。帶得詩來馬上敲。日色半黃冬似夏。江光全碧浪如潮。門連野水盟鷗鷺。徑轉榕陰鎖石橋。一片幽情無去住。還思秉燭在良宵。

李濱江廣南遊歸舟泊瓊島賦此贈之

握手無論相見遲。奇才獨抱有誰知。君深綠綺絃中語。我愛藍田畫裏詩。萬頃已探龍象窟。片帆聊挂海天湄。丈夫莫漫悲寥落。寶匣星文好自持。

訪林桂如邨莊

白雲芳草望中迷。人在濃陰古樹西。三徑堦前門掩竹。數峯戶對水流谿。青

藜夜楊驅仙臺。白屋芸窗養木雞。堪笑市朝名利客。馬蹄紫陌向風嘶。

疊石先生漫叟翁暨諸同人集石浪亭聽松

茅亭僻擣水之鄉。惹得高人引興長。眼底銀濤飛匹練。耳根天籟奏笙簧。怡情正有滄浪想。醉客欣傾曲水觴。師友嘯歌真快事。衣裾猶拂野花香。

和漫叟韻

不速同來客共遊。緣溪芳草一亭幽。松翻風浪聲飛渡。石疊虹橋影斷流。花塔高懸留夕照。月潭深漾隱潛虬。水聲噴噴喧人語。笑殺天翻入地浮。

登郡城鼓樓

選四

百尺危樓瞰大荒。萬家煙火正微茫。浮圖七級凌霄漢。盪海千帆破夕陽。王粲銜杯揮楚賦。庾公愛月坐胡牀。南離瀨氣當窗牖。縱步憑虛引興長。

其二

雄圖攬勝舊知名。樓閣欣看又落成。地接南交聯島服。氣凌北斗擁孤城。千

年瘴雨蠻煙闊。萬里鯨波獅海平。幸親瓊臺無事日。山阿鋤笠帶雲耕。

其三

景覽南溟入渺茫。身齊飛鳥共廻翔。七星雲影連滄海。三島嵐煙接大荒。熬背浮天波浪湧。霓光飮海颶風狂。奇觀自爾鍾靈異。早有人文應運昌。

其四

縱步層樓思渺然。瑤臺貝闕憶當年。西來秋氣窗中滿。北望晴峰海上妍。席接清光分五指。亭開洄酌汲雙泉。憑誰幻出摩空手。倒寫滄溟妙筆傳。

丙子仲春偕家懷晉永日汎舟分韻共賦

放浪江天恣遠遊。身閒聊得放吟眸。舟牽樹底傍樵爨。棹轉洲邊狎野鷗。片片花飛隨水去。娟娟雲影入波流。人生到處瀕行樂。兀坐雄談大九州。

九日問友吳旭升病

風塵鼎鼎百年身。閱盡榮枯迹已陳。僕本恨人愁作祟。君爲長者病何因。秋

風到榻仍耽臥。木葉盈堦倍損神。三嘆歲寒誰與共。孤懷直擬葛天民。

秋日訪張嘉湖

策蹇來遊自在行。詩尋驢背思橫生。秋高木葉長空淨。水積寒潭澈底清。落日停雲遠道思。悲歌對酒故人情。欲知栖隱柴門處。一縷茶煙擁百城。

丙子秋建江買舟入桃谿訪漫叟

凌晨曉露滿江邨。水逼清谿過雨痕。籬短未窺寒菊放。窗閒猶見海雲屯。懷人乍訪淵明徑。乘興頻敲叔夜門。翻怪市塵喧遠甚。獨持古道向君論。

別施澄菴歸攜李

天涯握手數經年。何忍驪歌唱復旋。兩地寸心存姓字。雙魚尺素寄詩篇。霜高水下關河邈。日暮風寒野水邊。遙矚徵書朝夕至。莫貪高臥隱林泉。

贈漫叟

滿几圖書寄一巢。草堂長憶訪西郊。旁搜世史兒同讀。檢得新詩孫共鈔。秋

種荒菑期有獲。書貽寒舍爲深交。康成老去真堪嬾。何事楊雄漫解嘲。

贈家懷晉兄

落落何堪寄一村。北窗高臥道常尊。淹留歲月惟耽學。閱歷乾坤合閉門。白髮愁多誰作介。黃金恨少孰同論。雲山迢遞雙魚杳。長向江干損夢魂。

丁丑花朝訪家印白弟

迢遞雲山空寄思。登堂此日愜心期。鴻泥迹合歡良晤。鷄黍樽前訴亂離。志矢青霄看驥足。微流俎豆羨皋比。

先公侯翁司鐸靈山從祀名宦詳省志

十年木榻存吾黨。寧獨

蓬蒿飽藿藜。

晚登慈雲巖

肩輿暫息夕陽殷。曲磴攀躋步履艱。清磬數聲敲落葉。深巖一火照禪關。天邊霞散偏成綺。洞裏雲歸不見山。旅次覓棲留信宿。忽聞人語響溪灣。

月夜贈梁瑞楨

詩

無奈雙心兩地懸。睽違六載倍蕭然。杯邀好月誰同賞。句入新秋孰共聯。溟海浮光空淡蕩。水輪有影問輝娟。停膠未慰羈棲願。擲管聊揮一幅箋。

寄懷李苑超世姪

布帆搖曳動江皋。倏忽分携看海濤。幾度臨風思遠道。連朝啜茗讀離騷。河梁話別音塵渺。湖海論交意氣豪。烏鵲南飛應不定。羽儀更羨遠天高。

遊惠液泉

久勒豐碑惠液名。一泓澄碧最含情。晴光倒映波紋動。樹色遙連行藻平。暑氣消殘知夜靜。煩襟滌盡覺身輕。臨流謔有濠梁興。倚石忘歸帶月行。

山產曉發馬上口占

層層西嶺去還斜。茅屋疎林有數家。十畝蒼煙浮碧樹。一灣綠水覆黃沙。天邊見影猶疑月。露下聞香不辨花。草草浮生空況瘁。休辭辛苦路三叉。

贈覃丹溪

松 谿 小 章

人生山水及交遊。良會思君紀勝遊。雅興已知添別野。豪情曾共賞新秋。當年叨下陳徐榻。何日同登李郭舟。此意那堪僭俗語。休辭白髮到吾頭。

建江清曉

題高明府定陽別圖

如練長江繞遠峰。天邊望盡斷雲封。何人正落丹青筆。此際時聞杳靄鐘。冉冉波光開潏潏。朝朝風雨洗芙蓉。盟心宦況清同鑑。無事催呼緩九農。

癸未仲春望日過石門訪江祥文不遇

曲徑紆迴林麓幽。蕭蕭榔葉度河洲。堂虛空許羣峯入。客去難消此日憂。採藥天台留阮肇。乘風碧落憶浮丘。三秋契闊春過半。何日重爲汗漫遊。

仲夏訪東河吳邃章友人山居

噴火紅榴照碧霄。故人此日信相招。棲玄早自開三徑。破悶何妨酌一瓢。當戶魚蝦喧晚市。隔林風雨聽新潮。遙知別後時相憶。尺素無妨破寂寥。

詩

詩

五八

贈寧波周漢雯

四明狂客舊風流。騷雅如君寶寡儔。依榻短檠銷永夜。入簾芳草寄新愁。乾坤放浪存青眼。鬢髮蕭疎憶壯遊。海外相逢聊慰藉。仲宣原欲賦登樓。

依原韻答林文若

夙讀立文守四輕。能捐物累卽清寧。每尋緒論窺河洛。好繹微言作典型。久羨夢花揮彩筆。休疑掛角見橫經。壯遊當獻長楊賦。早應奎光聚五星。

重九雨霽偕友人蔡天三由龍門塔過溪至松林

賞盡沿溪撲面風。寒煙漠漠夕陽紅。泉聲帶雨添秋興。塔影殘虹挂碧空。人入濃陰懷頓爽。詩吟令節句難工。茱萸此日誰同醉。爲愛招携冠及童。

謝樊明府遙寄詩箋

風高水落訴寒蟄。飛扎雲端下草堂。宦況公餘添旅夢。秋懷病後寄詩囊。苦

登 谿 小 尊

陰杜老偏沈鬱。俊逸參軍久擅場。珍重瑤牋藏秘枕。床頭常恐吐光芒。

秋淋阻約寄懷樊明府

永夜無端首屢搔。秋陰漠漠覆亭臯。山雲送雨狂飛浪。老樹因風怒作濤。倦倚匡牀勞遠夢。愁聽落葉醉村醪。使君有約空相負。何日輕舟手自操。

陳揆章招飲

秋雨阻行賦謝

萬疊煙雲永夜奔。盈堦秋潦坐孤村。有懷欲罄誰堪吐。折柬相招好共論。澗響忽驚雷雨急。徑深難印馬蹄痕。蓬門搔首空延佇。情切關心在弟昆。

癸未除夕

長年碌碌此宵同。白髮紅燈百歲中。日月無多如逝水。光陰容易歎飛蓬。一生底事留遺恨。半世沈吟愧未工。賈島殷勤徒補報。祭詩何以答微躬。

癸未杪冬喜陳惕若過訪松溪書舍賦贈

詩

風雨神交已有年。雅將翰墨結良緣。談詩真吐胸中錦。落筆俄生紙上煙。
時揮毫作畫曠識淵涵知我厚。寄懷卓犖倩誰隣。霜嚴木落相逢後。保此蒼松晚節堅。

入臨高道中同葉蒼崖作

寒風饒旭鬱蒼蒼。煙火微茫在半岡。茅屋田家環竹木。榕陰石磴散牛羊。花
封密邇來虞詡。閭巷歡騰道孟嘗。夙昔巖疆稀化俗。轉移一旦在炎荒。

奉和樊明府後堂落成原韻

隨意經營十笏寬。幽懷豈是熱爲官。清宵翦燭攤書卷。白晝揮毫拂素紈。部
屋民精求至隱。閉門吏散有餘歡。從容退食來茲地。翹首天垣列宿看。

甲申雨中七夕

雙星耿耿在銀河。浩淼銀河未易過。碧浪數層驚鵲駕。長年此夕罷龍梭。同

心有願歡常短。佳會難期事若訛。祗恐雨風多阻滯。憑誰寄語問如何。

甲申九日偕諸友人登文筆峯

得高字

松
光陰逝水去滔滔。每值登臨興倍高。石竇雲根穿磴道。嵐煙樹色響秋濤。登
舉莫負重陽節。得句休誇一世豪。大似東籬彭澤令。白衣人至樂陶陶。

菊月偕何心斗莫式翁攜樽過金蓮精舍劇談

小
閒遇招提興未闌。茶煙暫歇酒爲歡。行來觴政懷偏暢。說到人情膽倍寒。垂
老徒添雙鬢白。深秋空染萬楓丹。吾儕拓落知何憾。入世還從世外看。

步原韻贈周洛臣

臺
愛竹何妨問主人。蕭疎風雨最傳神。一間茅屋惟高隱。半畝苔階淨俗塵。天
際觀雲思故國。泉邊倚杖看遊鱗。孤懷豈但驚流俗。古道猶堪動紫旻。

冬月過嘉湖贈張惟簡

錢

十畝湖光隱暮煙。讀書求道自蕭然。兒能侍養親猶健。孫可扶鳩髮尙玄。庾
內香秣休問價。盤中甘旨取之麇。北堂萱茂堦蘭秀。泌水衡門樂晚年。

寄懷盧韓五

荏苒韶光閱五秋。青霜點鬢不能留。半函書札愁千縷。幾夜鷄聲臥一邱。搖
曳江舟明水閣。聯輝光幕坐高樓。知君日在畫圖裏。把臂何時可共遊。

寄懷邱雨長

老來暫次入清狂。掃地焚香只自忙。惠我瑤音如拱璧。懷君得句勝歡場。曾
玄遶膝金花隱。兄弟聯牀朱橘班。對此儘堪娛白日。好吟珠玉伴壺觴。

冬日與周洛臣登九曲尖峯

蠟屐茲山又一登。嚴冬携友到峻嶒。霜風倒捲推枯木。危石將崩糾瘦藤。萬
疊煙巒生足底。一江寒水映空澂。半生素抱凌霄願。老去攀援憶未能。

松 谿 小 草

那山雅集即席分賦

荔子離離映竹枝。興酣豈惜鬢如絲。良辰莫慮壺觴罄。天夜渾忘星斗移。看劍引杯聊共醉。當筵刻燭便成詩。人生此會恒難得。彭澤當年是吾師。

仲冬紀異

天南氣候異寒暄。冬景猶如夏日溫。穫稻農人遊綠水。解衣稚子弄朝暉。雷鳴徹夜終宵雨。河漲平原隔岸村。值此災荒人事變。何堪搔首問乾坤。

甲申杪冬喜晤疊石先生重遊建江

契闊常思化雨中。霜嚴木落又相逢。千年何意鬚眉換。六載惟憑尺素通。握手滄江驚歲晚。盪胸日影射波紅。居諸別後慚空度。振發何時醒積聾。

遣懷呈吳子菴

無事何妨擁鼻吟。蕭蕭白髮歲相侵。不眠徹夜空書咄。惟愛逢晴只惜陰。箸

詩

遠無多終覆轍。知交難遇莫彈琴。此中得失誰區別。千古還思正始音。

答莫介梧原韻

輕風細拂早生涼。手展殘編孰共商。蝌蚪遺文摻古壁。龍蛇淺墨走虛堂。清
齋晝掩雲千疊。寒夜眠遲月一牀。共此盤桓聊永日。時人休笑老夫狂。

清曉汎舟

河水潺湲夜有聲。清晨人在鏡中行。嵐煙乍合迷鷗夢。曉旭初開射鳳城。棹
影撥迴山色動。船頭觸處浪花明。開窗此際頻凝睇。身世浮沈寄此生。

戊子重九後二日誌感

連日詩魔并酒魔。枯腸挖盡醉顏酡。孟傾藏醴淺深酌。韻叶秋聲長短歌。豈
是沈酣成李畢。惟求古調效陰何。人生行樂真無幾。藉此潛消一剎那。

九日偕同人登萬松壟

得松字

松 谿 小 草

何必登山躡萬峯。呼朋載酒對高松。半空響徹飛鳴鶴。劈面時騰夭矯龍。短鬢年年吟落葉。秋風歲歲喚寒蛩。遙知此日層霄上。次第開樽興倍濃。是日

諸子有文
峯之遊

家鶴洲自萬春解組過訪喜晤有用故友連宵

共談

良朋聚首最難期。況是同心感素知。酒到杯深談正暢。榻憐夜短夢偏遲。乾坤屬我原多故。歲月催人幾幾時。此夜渾忘枯寂恨。摠懷惟詠數行詩。

九日會陽道中

己丑年

連岡複岫望中遮。漠漠煙村引徑斜。木葉落殘埋古道。芳樽遙憶對黃花。凌空塔影籠秋靄。入耳寒聲噪暮鴉。此日遣懷清興劇。莫嗟客路駐征車。

別李友生歸東莞

詩

曾將彩筆壯南遊。歷盡霜華又九秋。臥聽殘鐘依佛火。閒吟落月冷貂裘。鄉心早向雲中寄。客思還從物外求。他日相思何處是。試看壁上有滄洲。

莫介梧公車北上遼道定襄家晉子署詩以

訊之

送君獻策入長安。聖代求賢禮數寬。市骨田來知識易。懷才莫嘆賞音難。雪

開石室太原山名春先到。舟渡潯泥太原河名興未闌。近得王喬飛舄信。放衙曾否日三

竿。

喜嘉禾陸世兄過訪龍梅村居

連朝風雨暗孤村。紅葉堆堆客到門。玉勒嘶殘秋草路。藍輿踏遍石谿痕。烹嫌薄醖同酌。欲聽雄談風止捫。此際夕陽聊解意。西山返照助清樽。

答潘禿翁下榻末莉軒韻

松 谿 小 草

濠梁適意正忘魚。老去投閑守一廬。寂寂掩窗軟飽後。遽遽欹枕黑甜餘。平看遠樹煙如畫。近接晴霞紅映蕖。相對不知身是客。此間勝讀十年書。

送陳望雲歸餘姚

雲龍相逐數前賢。海外知交已十年。月下敲詩傳雅韻。花時命酒聽流泉。班荆誼篤同心切。桑梓情深兩地懸。此際驪歌初唱別。雁行何日復相聯。

庚寅暮春訪家鶴洲

人隨流水訪松門。曲徑深篁不辨村。紅日半竿孤棹破。溪煙一縷數峰痕。折腰陶令辭榮早。強項使君古道存。廿載相思今始慰。挂冠豈是負皇恩。

五指參天

何人伸一臂。五岳迥相同。疑是開天手。鴻濛寫化工。

過愈村訪王石君不遇

詩

言尋處士莊。雲影共低昂。衣袂染山翠。野花撲鼻香。

春日酌酒

燕語鶯嬌事事新。酒旗歌扇遞相親。勸君且拚花前醉。醉過花前有幾人。

春日途次

脉脉春情澹蕩光。鳩鳴綠樹蝶飛狂。淺深馬足行經遍。又逐閒雲過別莊。

題樊明府瀟湘夜月圖

煙波萬頃夜空明。鼓枻誰爲乘月行。知是使君有仙骨。又飛雙鳥過南溟。

偶成

午夜湖光上講堂。履聲彷彿到迴廊。教兒莫謾仍耽睡。授得降魔有妙方。

松

谿

小

草